

Ագարակ

Մակերես՝ 19.313կմ²

Բնակչություն՝ 1190

Տնային տնտեսությունների թիվը՝ 403

Գյուղ Ստեփանավանի տարածաշրջանում, Ստեփանավան քաղաքից 8կմ արևելք, մարզկենտրոնից գտնվում է 42կմ հեռավորության վրա: Նախկինում ունեցել է Ագրակ, Ակրակ, Աքրաք, Էգրակ, Էքրեք անվանումները:

Գյուղը տեղադրված է Ձորագետի ձախ ափին, սարահարթում՝ ծովի մակարդակից 1380մ բարձրության վրա:

Կլիման բարեխառն լեռնային է, տեսական, ցուրտ ձմեռներով: Ամեն տարի հաստատվում է կայուն ձնածածկույթ:

Ամառները տաք են, համեմատաբար խոնավ: Տարեկան թափվում են 600-700մմ մթնոլորտային տեղումներ:

Ագրոկլիմայական տեսակետից ընկած է մասնակի ոռոգման գոտում:

Գյուղը դեռևս հիշատակվում է 13-րդ դարում եւ մտել է Գուգարք աշխարհի Տաշիրք գավառի մեջ: Ունի 17-րդ դարում կառուցված եկեղեցի: Ագարակի մոտ գտնվում է համանուն մենաստանը: Շրջակայքում կան շատ հին բնակավայրերի, ս. Աստվածածին եկեղեցու ավերակներ:

Ագարակը 1831 թ-ին ունեցել է 56, 1897 թ-ին՝ 654, 1914 թ-ին՝ 999, 1939 թ-ին՝ 1581, 1959 թ-ին՝ 1366, 1979 թ-ին՝ 1273 բնակիչ: Ըստ ազգային վիճակագրական ծառայության տվյալների 2011 թ-ին համայնքի բնակչությունը կազմել է 1190 մարդ: Սեռային կազմում տղամարդիկ կազմում են 48.8%, կանայք՝ 51.2%: Ունի միջնակարգ դպրոց, գրադարան, բուժամբույատորիա, կապի հանգույց:

Գյուղատնտեսական հողահանդակներում մեծ բաժին ունեն վարելահողերը (279հա), խոտհարքերը (197հա):

Պետական հողերը գլխավորապես օգտագործվում են որպես արոտավայրեր՝ կազմելով 669հա: Օգտագործվում են նաև որպես վարելահողեր, խոտհարքեր, պտղատու այգիներ, որոնք ունեն փոքր տեսակարար կշիռ: Գյուղի մասնագիտացման ուղղությունը երկրագործությունն է: Զբաղվում են դաշտավարությամբ, պտղաբուծությամբ (տանձ, խնձոր, կեռաս), մշակում են հացահատիկային, կերային, բանջարաբուստանային կուլտուրաներ:

Զբաղվում են նաև խոշոր եղջերավոր անասնաբուծությամբ, մեղվաբուծությամբ:

Համայնքում գործում են հանքարդյունահանող, վերամշակող, էլեկտրաէներգիա արտադրող ձեռնարկություններ:

Համայնքի հիմնախնդիրների մեջ կարևորվում են մշակույթի տան վերակառուցումը, խմելու ջրագծերի վերանորոգումը, ներհամայնքային ճանապարհների վերանորոգումը, դպրոցի մարզադահլիճի կառուցումը: